

Malaysia tumpu pelaburan berteknologi tinggi dari Korea Selatan
AstroAwani
24 November 2019
Rahimah Abdullah

BUSAN: Malaysia akan menumpukan kepada usaha meningkatkan pelaburan berteknologi tinggi dari Korea Selatan.

Duta Besar Malaysia di Korea Selatan, Datuk Mohd Ashri Muda berkata negara boleh mengambil kesempatan untuk meningkatkan perdagangan dan pelaburan hasil Sidang Kemuncak Peringatan ASEAN-ROK serta lawatan rasmi Perdana Menteri di Seoul.

Malah, Malaysia boleh mencuri tumpuan Korea Selatan susulan pendekatan New Southern Policy yang digunakan Presiden Moon Jae-in sejak 2017.

“Tumpuan kita adalah kepada teknologi tinggi yang melibatkan high capital investment. Seperti Vietnam, kos buruh mereka rendah berbanding Malaysia. Jadi pelaburan di Vietnam-ROK menumpukan kepada labour intensive investment.

“Jadi kita pula mengharapkan pelaburan yang berteknologi tinggi dan tidak memerlukan tenaga kerja yang ramai. Itulah tumpuan kita kepada pelabur Korea,” katanya kepada media Malaysia di Busan pada Sabtu.

Pada tahun lepas jumlah perdagangan antara Malaysia dan Korea Selatan mencecah AS\$19 bilion.

Ketika ini terdapat kira-kira 800 warga Malaysia berada di Korea Selatan.

Daripada jumlah itu 500 orang adalah pelajar Malaysia di bawah tajaan Jabatan Perkhidmatan Awam (JPA), MARA dan kerajaan Korea Selatan.

Selebihnya adalah mereka yang bekerja di republik itu.

© 2019 AstroAwani Network Sdn. Bhd.

(535275-D) All Rights Reserved.

Source: <http://www.astroawani.com/berita-malaysia/malaysia-tumpu-pelaburan-berteknologi-tinggi-dari-korea-selatan-223471>